

甘泉鄉人稿

甘泉鄉人稿卷二十

嘉興錢泰吉輔宜

順天文安縣主簿程君暨配錢孺人權厝誌

嗚呼程君不克歸其祖父墳塋而乃權厝於此也耶惟  
我長祖姑適嘉善程芝圃公諱國祥公早沒祖姑年十  
八而寡撫嗣子乾隆庚子進士官山東道監察御史諱  
維岳君爲侍御長子也諱若容字寬夫配錢氏余長姊  
也子菊孫萸孫女適道光癸未進士山西曲沃縣知縣  
臨川李培謙萸孫殤庶出子錫孫爲叔父後女二君享  
年四十七姊年四十五嗚呼先大夫官吳橋知縣時君

來贅未踰月而我伯兄叔兄三姊相繼夭慰我父母於  
悲哀中者惟君及姊明年姊歸後有人自姊家洙涇里  
來爲余言姊家有園亭之勝藏書甚富私心竊冀他日  
歸見姊得從君借書可樂也及先大夫喪歸侍御已下  
世田園書籍爲叔子斥賣略盡君奔走四方姊依母以  
居余足跡未嘗一至洙涇里嗚呼物聚必散理之常無  
足怪卽余所見擁厚貲田連阡陌不數年爲簞人子者  
非一姓然或徵歌選舞博弈飲酒日耗千金或傾於外  
侮或水火盜賊破其產大抵聚之非其道其亾也忽焉  
程氏自我祖姑辛苦教子以成其家侍御久京宦以長

者見稱其傳宜久君爲人謹厚無子弟之好乃敗於家  
難不獲一日安其室旣出而求仕而其先人之墓屋宰  
木幾不保嗚呼此豈理之所可測識者耶姊性溫至善  
事父母舅姑家之有無不以爲欣戚嘉慶丙子君以縣  
丞借補文安縣主簿迎姊至官舍庚辰八月余自京師  
往省時已丙夜姊在寢隔戶牖與語君急披衣起爲余  
具飯踰宿乃別明年六月二十二日姊以時疾卒又明  
年歸厝於秀水縣之九里匯甲申五月十二日君卒及  
柩歸亦權厝焉余欲述其生平以舒我哀卒卒未就今  
菊孫之婦屈氏死又將從舅姑於此菊孫方餬口四方

未知何日得謀窀穸乃書君及吾姊之大概并道程氏家事之可哀者以示菊孫使知理之不可測者天天或悔禍於程氏將必有人焉食其福則天之既定而仁者有後我能不望於菊孫菊孫而守正勤業以待夫天也則君夫婦之歸葬於先壟必有日矣余將礱石以續爲君銘道光八年十二月十三日錢泰吉誌

封奉直大夫長沙李翁墓誌銘

道光十有七年八月海甯州知州長沙李君象昂以其父蘭亭先生思鄉里將乞養或勸止之援琴鼓歸來引且誦其辭曰吾父之志也泰吉聞而賢之得請兩月未

及歸先生疾作泰吉往問疾見先生危坐召畫史寫真  
曰某日吾將去無幾微戚戚之色踰月竟不起十一月  
十四日也年六十有六嗚呼先生可謂知死生之說者  
矣其明年將歸葬知州君具狀乞銘曰吾父夙愛重子  
之文母辭按狀先生諱景均字熙凝一字熙臣晚自號  
蘭亭先世本呂姓系出東萊明初由安徽遷長沙遂爲  
長沙李氏祖諱宏材父諱開熾皆有隱德詳桂林呂郡  
丞新城陳侍郎所撰傳誌先生至性[淳]篤母氏寢疾三  
年侍養不少懈嘗深夜禱山中感神異寓屋壞厭焉得  
無恙人皆謂純孝所致云年十六通經史大旨意欲見

用於世伯兄沒父母憐其勤令棄舉子業迨遭親喪益  
淡於榮利而以所學教其子知州君以選拔貢生官浙  
江麗水金華常山錢塘等縣知縣擢海甯州知州所至  
有聲先生教也其初至海甯也海塘大工方殷日役數  
千人多無賴石工尤橫一日於衢路摧辱人莫敢誰何  
方檣柱閒胥吏持官符突至捽曳趨治所知州坐堂皇  
以待痛懲之眾皆驚顧錯愕已而知先生適過其地急  
歸語知州也益震懼終役慙然無敢暴橫者錢塘有母  
訟其子者其子諸生也知州心憐之獄未決先生微服  
至頌繫之所以天性感動其母子皆泣下母乃請釋其

子以歸卒爲善士其兄亦諸生也常常曰微李翁吾弟  
幾陷大惡衡州李君逢姓習聞之今年來權許村場大  
使爲言其事嗚呼先生雖不求用於世旣以所學授其  
子見諸行事矣而時時隱察小民之疾苦以教成廉明  
慈惠之政至老猶不怠蓋就養幾十年其用心多此類  
故以泰吉所聞見者詳著之配黃孺人有婦德子二長  
象晨前卒次卽象曷孫四家佾家僎家仝家儁以道光  
十有口年口月口日葬于清泰都官坤之原泰吉於知  
州爲僚佐以文字相善而於先生又習其行事也遂銘  
曰



孝乎惟孝施有政以植其家成子姓任理棲遲處不競  
世有昭名協隱行

四川榮昌縣知縣龍府君墓誌銘

君諱翔字鳳翥雲嵐其自號也先世居湖南武陵縣之  
河湫源前明時君九世祖四川梁山縣知縣諱誠始遷  
桃源縣之硤洲村由是世爲桃源縣人高祖諱顏悅曾  
祖諱海躍兩世皆諸生祖諱士相父諱中鼇皆篤學力  
行以君遇 覃恩贈如其官君以常德府學生中式乾  
隆五十一年舉人六十年大挑二等嘉慶三年選授嘉  
禾縣訓導道光二年推陞湖北鄖陽府教授三年吏部

截取會大吏亦以行優治卓薦四年授四川重慶府榮昌縣知縣五年八月任八年以疾告歸十五年五月十九日卒於家壽八十有五葬於朱家港新山之陽君之學以誠意爲主而歸於慎獨端居靜坐則取宋名臣言行錄朱子學的薛河津王陽明劉戡山諸家著述熟讀深思以求天人性命修身立言之要其教士則敦樸質實而使之嫻習於禮嘉禾之士有不衣冠來見雖溽暑必禮服接之在事二十有四年葺廟學置禮器修建講堂廣闢齋舍選士肄業焉他若建考棚輯邑誌皆賴君成之其教授鄖陽也未踰年而鄖山書院生童膏火之

資亦賴君而集蓋君之祖父皆留心經世之務君秉承家學而又博觀約取務求實踐其未仕時教於高涼嶺教於德勝岡皆能成就來學論者咸謂君之才宜治民不當老於學官及榮昌之除君年七十有四矣榮昌故多盜君曰治盜猶治水也禦於此必潰於彼非預爲受水地隄防不得盡其功省視獄囚出小偷數輩貰其罪杖而與之貲使爲生戒毋再犯責問其巨猾使盡吐諸盜姓名曰暫貰若死致諸盜以自贖四川民喜團練而畏保甲吏因其俗保甲法久弛君參稽王文成公成法條議以上大府大府下其法於州縣而君行之於榮昌

最得要領由是盜之酋長盡捕得縣以無事川東地沃饒鮮水利君相度形勢教民築堰開塘設筒車汲引河水刊圖說以示之書院有田十餘頃在南鄉以旱告君詣其地閱視之曰是濱象鼻河其水可灌溉也乃鑿渠以綰蓄山溪之水開濬象鼻河舊堰於上游灘溜處築石壩截其橫流注於渠而匯於三教寺側建閘以司宣洩自是榮昌無旱患君決獄多奇中而一本於誠有兄弟爭田者請往勘君不爲理曲直但令背誦常棣之詩且曰縣官民之父母也不能使子姓無相爭忍令胥役擾之乎必欲往視田若兄弟卽肩吾輿以行皆感悔泣

下然君之馭胥役嚴以事行視鄉亭僕從稀少亦無敢  
翫法者時奉省檄設鄉學榮昌所創立者二十一所君  
以時詣其學舍課勤惰故雖鄉鄙之民皆習君之教而  
獄訟衰止也嗚呼君之治縣也已逾古人懸車之年觀  
其所施設雖強仕服官者莫能及昔龔遂之治渤海年  
亦七十餘單車至府盜賊皆罷以君方之蓋無愧色嗚  
呼綜君之生平亦可謂以經術潤飾吏事者矣君三娶  
皆封宜人元配陳安福縣處士廷一女生子澤溟太學  
生次配高贈修職郎增女生子澤澍候選主簿今夫人  
殷湘陰縣太學生文化女生子澤皓浙江候補知縣厯

署新昌龍游等縣知縣女一庠生高澄其壻也孫十人  
曾孫十人道光十八年泰吉與知縣君相見於杭州以  
禮乞銘君之行應銘法知縣君又能繼君之政者其敢  
辭乃詳著學問之大端及官政之卓卓者以爲世法其  
居鄉孝友之事備於家狀不具書銘曰

龍氏治行肇於梁山九世之後益大以繁榮昌嗣聲發  
軻學官二十五載教士有恩沅江之水出自且蘭其入  
洞庭必經桃源君家桃源爲蜀令君清如巴江飲符之  
溫紀績銅鼓永永不刊文翁學堂周公禮殿勞心諄諄  
士子蓁蓁秩滿而歸老於鄉縣子孫奉嘗亦如桐鄉納

銘幽室終古其臧

特齋先生墓表

自宗子之法之不能行於後世也維繫乎族之人始賴有族長焉士大夫之族其長往往宦於外近乃千百里子弟之賢否莫得而別擇也其在鄉里者又或老而倦於事不足以統攝於是又賴夫家居之耆老有德行者爲眾所尊以佐族長所不逮以選擇其族之賢士相輔以教使夫才智者觀感興起不肖者有所嚴憚而不敢肆實家法所賴以不墜也吾錢氏當嘉慶之初我世父戶部公方家居修廢舉墜族之人奉公若宗子於時我

族之賢而有文若特齋先生者尤爲戶部公所愛重歲  
丁卯命泰吉受業焉泰吉自成童後備聞先人之世德  
雖愚不肖不敢自菲薄得稍有成立先生之教爲多其  
後與先生從弟本之纂修族譜則奉先生所畫世系圖  
以爲準則也先生平居恂恂於人無所忤然鮮當意者  
其教人也微言婉導未嘗見嚴毅之色持躬廉儉畢生  
不改其操方我宗貴顯時雖甚貧不肯通尺書有所干  
請也戶部公嘗謂泰吉曰族祖處士筠汀公當明之中  
葉門戶方盛時邑中親知有屬以事者輒拒卻曰吾族  
幸被此榮施也忍以非事慫乎族人至今傳其語若耕



良者有處士之風矣耕良先生字也歲辛未戶部公卽  
世我兄學山先生奉遺訓以庇我族之人又三十年學  
山先生及弟雲壽先生皆我宗所推重以爲賢皆自少  
受教於先生者也先生中年境益困授徒以自給有妹  
嫁海甯州硤石鎮蔣君涇村涇村雅重先生之學行及  
疾革與先生約幸謝生徒居我家以終教我子先生固  
辭而後許於是先生館於蔣氏三十年先生好讀資治  
通鑑爲其甥霽峯及甥之孤子光焞道往古興衰治亂  
之源與夫碩德美行之可爲法守者甚悉少工楷法老  
益端嚴曰欹側以求媚我不取也歲乙未先生年七十

泰吉趨謁將爲壽先生曰我讀溫公書歲數周千載直  
旦暮耳七十之年何足道堅謝不許道光二十四年正  
月五日先生卒於家年七十有九先生諱爾琳秀水縣  
恩貢生爲我七世祖魯南府君九世孫曾祖宏基國學  
生祖湄嘉興縣學武生父慶升母徐氏先生兩娶皆王  
氏子炳華繼王氏出早卒繼褚氏子炳虎爲叔父後炳  
麟後先生數年皆卒孫元貞先生卒年之冬蔣光燾葬  
先生於海鹽縣歲圖竹窠裏之原以其配祔先生曾祖  
以下族葬之所也光燾風雪中執紼從事墮水幾殆而  
治葬益誠信感先生教也光燾每見泰吉必述先生之

介節謂宜有文以示後泰吉不敢辭嗚呼自先生謝世後我宗之耆德零落太半今我族長爲觀察房第十一叔父久客直隸不能歸我族之人幾無所統攝矣後生觀法不知所從泰吉幸未死而爲先生墓上之文執筆涕零不獨爲先生悲也咸豐四年六月旣望泰吉謹撰

四川彭山縣知縣錢君墓表

君諱聚仁字本之味根其自號也與泰吉同出於明孝廉魯南府君魯南府君之孫當崇禎初以貢生上書論魏忠賢十大罪後官福建松溪縣知縣唐王監國授山東道監察御史孚于公諱嘉徵君之七世祖也曾祖諱

載禮部左侍郎於泰吉爲族父祖諱容錫庠生父諱善  
膺廩貢生母陳氏君以嘉慶十八年秀水縣拔貢生充  
武英殿校錄二十三年中式順天舉人校錄期滿議  
敘知縣選授四川眉州彭山縣知縣親老改選江南之  
興化迎養二親莅任逾年民以爲廉明且稱其孝也丁  
父母憂歸服除之四川坐補彭山道光十八年也彭山  
濱大江賴江水以溉田故籍謂李冰嘗爲六堰門六水  
門擁江水以灌郡下田卽今馨堰故址也唐章仇兼瓊  
五代張琳亦相繼開堰其利尤博乾隆時張侯鳳翥益  
疏鑿之縣以張公名渠者甚眾歲久多塞君尋求故跡

疏濬補治之如其舊十八年夏米價翔貴斗直錢千急發常平倉及濟倉穀平價以糶不足則勸募以濟之自夏及秋民不苦飢君曰此特一時計耳未可久遠也乃請於上官以州庫積存彭山廢社倉穀價銀八千餘兩買田三百二十餘畝爲濟倉田歲可得穀六百石以上斂藏以爲水旱乏食之備民旣德之君曰盜賊不衰息民食雖足未可也縣東鄉上接華陽新津下連眉州中間三四十里與仁壽連界盜賊易竄匿故事聯眉州仁壽爲三合總團互訶察捕治法最善久而弛懈君往來相度自黃豐場起至象耳山鹽井溝以迄雙江場卽舊

有各團聯爲一與附近縣約盜發共掩捕民賴以安乃脩學校整飭江源書院以溫經課士暇則躬教督之在事十餘年不稍怠若其屢決疑獄多可紀述未足爲君異也嘗署巴縣廣安州皆有惠政二十年鄉試充同考官能得士君察理明處事審熟悉古今利弊所當爲與不當爲者權衡既定則持之堅雖善辨論者不能難亦莫可奪也其未仕時常讀漳浦黃忠端公及族祖商隱先生遺著博蒐約取繫年爲譜以時觀省其所師法蓋遠且大也嗚呼以君之才識而僅及於州縣惜其所施者隘矣君至彭山屢通書與故人約年六十當告歸及

期與大府悟曰可踐吾言矣急引疾歸二十九年我鄉大水振救之策秀水爲最善亦賴君總其成咸豐二年二月十一日以疾卒年六十有五以其年冬葬於海鹽縣永安湖上萬蒼山左麓魯南府君墓側君娶嘉善王氏子卿萊庠生早卒卿芬監生卿黻庠生女一未嫁卒孫宜稼宜秉宜和宜科昔巢先生鳴盛撰孚于公事狀謂公令松溪三年敦禮敦厚風俗省刑獄而仁恩深嚴保甲而盜賊消於公之政事舉其大綱矣然公當改革之際不欲留名於後世所爲文字多自燬故不得而詳焉其後桐城錢田閒澄之嘗貽書松溪令董君欲爲公

請祀名宦蓋公論不可沒也君生際隆盛與孚于公所處之時不同然雅不欲以文字自見其治縣之案牘以及碑記之文扁置篋笥不輕示人若發篋盡閱之條件排比可成政書爲治縣者法余衰老未能爲乃卽所聞見舉其大端以爲表墓之文後有訪君之治績若錢田閒者以吾文質之彭山之人當無愧焉其家事之可法者茲不具咸豐四年六月朔泰吉撰

桐城吳君夫人權厝誌

道光十有四年五月十三日桐城吳君康甫配張孺人卒於杭州官舍其明年三月歸厝於縣南五里廟上壩



之東吳君熟于金石文字出所撰行述以示泰吉其言甚質乃敘其意而爲之銘曰

桐城大姓若姚若張與吳頡頏孺人張女姚之自出爰歸吳室伊昔吳公重三綱首慎於擇婦吳母協趣遺言是遵乃擇良辰告於禰廟將加之卜禮儀孔肅惟我康甫人材足依鄉里稱之願嫁女者日凡幾家導言孔多母曰不然惟張氏女先靈所許旣嫁宜吉果協筮言歡笑盈門逾年免身幾以乳死弟願代姊夜夢神君祖妣先舅在神左右搖手令去霍然而蘇起事君姑君姑命之聿來武林五年于今二十晝夜侍夫君疾默禱而吉

竟以身代年三十三歸瘞城南君姑父母不得終養臨絕悽愴敬事夫君積年不替宜昌其世志祖紹祖有二男子孺人不死女子二人式順式柔姆教是脩我爲殯表其辭無愧康甫所記

長沙李母黃宜人墓誌銘

道光十八年海甯州知州長沙李君象昺歸葬其父熙臣君泰吉旣爲撰墓誌其後九年李君來杭州握手道故有戚容知其母夫人卒於廿有四年正月六日旣葬而除喪矣出行狀屬補作誌墓之文辭不獲乃銘曰  
宜人黃氏父孝職作嬪于李年十七善主中饋勸紡織

老姑病足扶侍密歲時笑語疾若失弱齡二子實岐嶷  
口授諸經機杼側謂父遠行祖老疾勉寶千金茲一刻  
夫君歸省父疾亟入門號慟面深墨佐成大事瘁厥力  
四方之志不遑息內顧無憂有賢匹延師乏資山宅質  
教成二子各英特次君升名出宰邑二老養志喜動色  
浙水東西頌聲集忽失長君淚沾臆俄頃悲風動海國  
乾蔭偏傾愛日昃湘江歸舟母勤卹慈烏返哺息羽翼  
六年侍養不離膝壽七十二終寢室吉祥山陽營兆域  
我詞不文貞石勒賢母佳城過者式

烈女張珊姑墓表

道光三十年冬禮部准故事具奏二十九年各直省所  
上烈婦三十六口

予旌以否惟

上財察

皇上以仁育萬物爲心恐天下婦人女子相率效慕輕  
殺其生也

詔不必旌咸豐元年二月

特降

諭旨於冬春之交冷煖不時翳此貞魂勿令抑塞前  
年直省所上烈婦三十六口

詔不予旌者皆

子旌表浙江杭州府海鹽州十九都祝家橋鄉農朱興仁聘妻張珊姑其一也珊姑少侍父疾半載以孝聞十四歲許字於朱二十三歲十一月十五日興仁死聞於張越一日珊姑晚侍父母食如常入室織如常夜半潛出投於河父母驚覺蹤跡之見絮襖在岸石上珊姑所遺也順流求之不得明日得屍於珊姑伯祖母陳墓前陳與其祖姑楊皆年少苦節珊姑夙聞其事而心誌之者也里人謂珊姑旣死遡流而上乃至此皆驚異泰吉聞之召珊姑父國純訪求本末將上其事國純愿樸人

也固辭而後泣道之事在道光二十八年大府上奏則二十九年也嗚呼弱女子誓殉所天皆誠壹之所致非有所冀幸而然也卽不予旌豈若東海枉殺孝婦之足以致旱哉

皇上體

天出治因氣候之偶偏渙汗大號使一夫一婦無不與被

聖人之澤珊姑乃得與三十五人者同荷

旌揚此不獨珊姑與三十五人者之幸抑亦天下之幸也若婦人女子不幸而失所天能矢堅忍之節以成其

家乃理之正勿激於一時之悲憤以輕殺其軀則凡有風教之責者所當尋繹

聖天子遲久而後予旌之意以家喻戶曉者矣下邑士庶捧誦

詔書走相告語國純感泣歌頌將以

賜金合葬珊姑夫婦於其鄉泰吉幸爲學官表烈女之墓乃其職也嗚呼可以不死而死珊姑之烈也可以不旌而旌珊姑死而邇流之精誠其亦久久不至泯沒也夫咸豐元年冬十二月海甯州學訓導錢泰吉謹撰

泰吉伏讀

上諭謹撰墓表以畀張氏乃寄書兒子應溥屬其同年友平湖謝棨照詳錄題

奏之稿得三十六人夫家姓名里貫擬敬刻

聖旨碑并列各直省烈婦烈女於碑陰

附錄碑陰

江蘇巡撫傅繩勛題八口

吳縣儒童謝廷堦妻彭氏

無錫縣職監張耀墀妻王氏

寄居上元縣安徽合肥縣儒童王尙義妻方氏

宿遷縣民包景鴻妻劉氏



寄居宿遷縣浙江仁和縣儒童胡其楷之未婚妻  
沈氏

邳州監生曹榮妻韓氏

沛縣儒童馬學恕之未婚妻張氏

睢甯縣民張以約之未婚妻劉氏

安徽巡撫王植題十一口

全椒縣儒童袁貢璆妻張氏

六安州儒童吳昌熾妻鄭氏

懷遠縣處士賈士儀之妾朱氏

懷遠縣儒童周本成妻王氏

懷遠縣儒童周逢春妻金氏

懷遠縣民劉化昇之未婚妻杭氏

績溪縣民戴文元妻張氏

寄居盱眙縣江蘇丹徒縣民殷尙春之未婚妻宋氏

定遠縣儒童蔣汝金之未婚妻楊氏

舒城縣儒童韋光前之未婚妻江氏

婺源縣儒童胡宗梯之未婚妻王氏

前任江西巡撫費開綬題一口

寄居新建縣江蘇崑山縣儒童王樹元之繼妻周

氏

前任浙江巡撫吳文鎔題三口

錢塘縣脩生李坤元之繼妻邵氏

平湖縣廩生陳恩照妻朱氏

海甯州民朱興仁之未婚妻張氏

山東巡撫陳慶偕題一口

海陽縣民趙淮妻王氏

署理山西巡撫蔣蔚遠題三口

高平縣民宋銳妻李氏

渾源州武生龔正雲妻左氏

渾源州民蘭室妻王氏

河南巡撫潘鐸題三口

湯陰縣民李圻之繼妻王氏

新安縣民張儒行妻鄧氏

新鄉縣儒童劉全貴之未婚妻范氏

福建巡撫徐繼畲題二口

連城縣儒童沈期水妻林氏

詔安縣儒童林錫嘏之未婚妻黃氏

湖北巡撫裕泰題一口

蒲圻縣即用知縣章含之繼妻彭氏

廣東巡撫葉名琛題一口

文昌縣儒童于雲篋之未婚妻馮氏

陝西巡撫張祥河題二口

蒲城縣民王立妻張氏

邵陽縣民田如珠之未婚妻楊氏

禮部主客司行走七品小京官謝榮照錄

祭姑夫蒯鐵厓先生文

嗚呼初識先生析津官舍北風怒號冬日之夜與我姑偕行裝來卸有弟及我年齒相亞繞堂穿林篠簞同跨其明年春乃遷外城琉璃廠肆骨董充盈相從閱市靜

聽評衡粗識瑰寶如盲得明旅館短檠圖史縱橫先生  
高吟我姑載賡未幾告別出官濟南鵲華秋色晨夕幽  
探判事之暇畫筆益耽訪碑任城坐臥其下手拓以歸  
冥心摹寫遂工八分敵者蓋寡桂林之山奇絕海內天  
道詩翁驂鸞往對落紙雲烟蓊鬱靈霽昔我從祖曾守  
茲土從父從兄衡文接武盡寫烟嵐筆挾風雨我姑繼  
之家傳畫譜桂海虞衡前志可補先生治績有聲麗江  
猺獞安堵夜不吠虺論事風發慨當以慷彼忌之者有  
舌如簧先生曰嘻曷歸故鄉孔雀一雙詩草一囊蓬窗  
共載故人兩喪歸築家塾以課耕讀笑看兒曹文軫連

轂曰仰南樓張畫臥游書聲機聲以相唱酬云何我姑  
未艾卽世我弟純孝相繼而逝先生惘惘獨坐揮涕乃  
眷舊姻申以重親黃雞白酒歡會連旬嗚呼先生晚尤  
繼繼時出好言慰我偃蹇先生日遠我學日損顧念平  
生款款惘惘敬奠一尊以達誠懇嗚呼哀哉

祭蔣母錢安人文

惟錢與蔣累世重婚蔣女歸我宗伯之孫兩家燕好久  
而益敦嗚呼安人我族素著同出魯南支分侍御其於  
宗伯兄孫季女幼嫻母教蘋蘩筐筥知循法度不失厥  
緒惟瀘村翁行脩於躬爰求作配德望益隆我見瀘村

年纔逾冠安人長兄我侍書案歲時翁來采山亭畔頻  
共我師飲食衍衍今四十年舊夢未斷我宦海昌翁已  
云叻翁之次子安人所生協我宅相以宏家聲我折輩  
行呼之曰甥我初病甚安人來城候我學舍乃偕長兄  
我病得愈亟思遊眺我甥愛客短札號召雙峰蘭若竟  
日舒嘯誰謂此樂後期難料甫逾一年我甥已矣四歲  
遺孤哀哀何恃共撫教之賴賢娣姒冰霜之節天日是  
矢謂姑勿悲同誓生死以成此兒責無旁委姑泣謂婦  
亦曰勿悲兩世三孀同心撫兒堅貞之志天或憐之家  
門之衰我當振之平生耐勞早作晚息佐[涪]村翁克勤



婦職既遭兩喪治家益力心縷日抽血淚暗拭儉於一身厚於三黨於賓於祭於師於長於人失所於歲失穰供給周恤屢出重糴視翁在時弗爽銖兩安人之兄不獨我師我宗之賢眾所共推晚歲蕭條惟妹是依生養死葬所願無違嗚呼安人我言不私有德於蔣非我所知其厚於錢我誌之宜[澗]村隱德後嗣必興安人五紀夙夜兢兢宜爾食報老福是膺宜爾孫曾振振繩繩萬蒼山巔魯南公墓仙掌讀書伊昔侍御安人平生先人是慕從[澗]村翁星駟卽安幽宮蔭連宰樹激上有神永永呵護

甘泉鄉人稿卷二十

甘泉鄉人稿卷二十一

嘉興錢泰吉輔宜

讀舊書室詩

勵志

嘉慶丙寅

人心如走馬放之則易逸用志若沐髮焚之則難櫛天  
苟不周旋何以厯時日水苟不盈科其流則不疾惟祖  
樹之基惟考作之室嗟予疲朽材枉自飾丹漆時懍長  
者訓慎勿虧稚質立身期樸誠爲學貴縝密

觀先兄四水子致衍石兄

儀吉

小札痛成

嗟予生七載伯也棄予終幼小哭還欠尋思夢併空喪

連多天折

歲丁巳第三姊及仲兄與兄相繼而歿纔五日耳

塊獨剩孤窮今夜

總帷側

時先君之喪未除

寒燈泣斷風

翰墨一相檢淒涼尙忍論果然成大病永不返真魂中

有夢中魂魄苦離恐大

語十載去何所雙楸高墓門寐興

其敢忝差幸奉遺言

兄自京至吳橋贈言衍石兄以爲別分存心讀書保身爲人四門談

理切實似先儒格言衍石兄曾鐫諸版

### 放歌

人生何所樂得其所樂還其天世人碌碌如磨之盤旋  
天心日遠徒煩煎靜言思之心茫然吾生於辛亥今且  
丁卯之春已在前人生卽得百年壽今茲已度十六年

少壯不圖老且悲予心茫茫當奚爲麒麟原爲聖人出  
驚駘力以鹽車疲天之生我果安用敢辭鈍拙誇權奇  
願得山林之樂樂莫樂卿相尊榮非所期山林山林高  
蹈知何時世人聞之笑予癡卽癡夫亦何足奇請觀載  
冊上達人適性豈顧世俗嗤人生各行其樂耳夫誰非  
我我非誰獨坐高歌曠野風來仰首看天雲日爲開丈  
夫豈徒恃此三寸舌要使天機浩浩一空萬古之塵埃

朱買臣墓

丁卯

嗚呼朱翁子丈夫願墮溝中耳但知讀書田產何須理  
負薪歌嘔亦足豪且歌且誦那顧世俗恥有書撐腸歌

嘔自喜賣薪給食聊免飢寒死衣錦非所榮那知五十  
富貴始一旦奮身長安中春秋楚辭解說靡所窮引綬  
視印守邸驚中庭拜謁駟馬迎君不見入吳乘傳誠快  
意深怨平生何足記何乃園中殺故妻牀上死小吏惜  
哉富貴而肆志嗟嗟有田已爲他人有有產亦爲異人  
守上冢何人奠杯酒衣錦之榮曾幾時不如讀書歌嘔  
聲雖盡矣名長久

釣鼈磯

但有釣鼈磯而無釣鼈客湖水徹底清鼈兮何所宅

自隔

自隔笑言後于今忽二年一坏猶未就七尺竟徒然庭  
誥平時授官箴累世傳孤兒仍不學何以慰原泉

雪

戊辰

日日望雪雪不得地底潛溫化蝗蚋時將臘盡乃作寒  
飛花片片墮我側積不成寸俄晴融司寒無乃失其職  
君不見京華十月天霜凝白野冰填川一日二日雪載  
塗行人堅冰凍在鬚蟄蟲坏戶不敢出夜深冰面跳老  
狐京華厭雪雪不止江南望雪雪更無爲問滕六彼何  
人使我天公澤不均今朝微雪亦可珍幾日縣官出迎  
春作詩告天公盍早霑足用使來歲大熟無飢民

柳已巳

三眠三起倩誰憐  
雖解含情亦枉然  
兩岸絮飛人不見  
曉風愁殺柳屯田

漫成

穠穢真堪笑  
謀生總未諳  
人情誇黠鼠  
我懶效眠蠶  
邵子四無妄  
稻生七不堪  
似聞多捷徑  
何處是終南

村農嘆

前年禿妓生  
去年商羊舞  
今年幸有秋  
催租一何怒  
小兒向母囁  
狀若畏猛虎  
東鄰租早完  
報賽擊土鼓  
西鄰賂里胥  
負租亦安堵  
而我何以償  
身上無完縷  
輪將困



敲撈賤與犬羊伍吁嗟農納租王政無苛取奈何樂歲  
農反不如商賈村農爲我言淚下紛如雨三年一歲豐  
那補兩年苦

范大夫祠

庚午

心豈扁舟戀防身感犬烹鴟夷終古去烏喙信無情本  
欲江湖老徒傳貨殖名留侯同此志廟食愧韓彭

古瓦硯歌賦謝徐夫子

并序

徐怡亭夫子

景園

得瓦硯於保安市上持歸見貽篆文

四字陽湖孫淵如先生瓦當圖中有之云是永受嘉福  
又云迎風嘉祥兆爲蟲鳥書不能辨定亦無確證不知

何時何地但云非秦漢以後人所能造

君不見秦阿房漢望仙銅龍金爵梅花榑古來宮闕今  
何在芙蓉芷若隨雲煙金楹玉柱長已矣惟有益壽延  
壽之瓦時流傳吾師博物嬾羣雅足蹟平生半天下邇  
者遠自保安來贈我長安古時瓦吾生性亦愛揆奇百  
遍摩挲不能捨上有永受嘉福辭陽湖圖中曾見之又  
云迎風嘉祥兆蟲魚奇古聊存疑何人好事製爲硯恍  
如璧月三五時配以猩毛之筆蠶繭紙臨風宜寫黃絹  
幼婦詞嗚呼峒嶼碑岐陽鼓尊彝圭卣豆區鬴吉金貞  
石世已稀區區片瓦乃不淪塵土置之鎗金匣縈以五

雜組銅雀香姜難與儔端州青花金綾那比數

病中度歲 辛未

小病拋書卷經旬作鷺拳嬾憑烏几坐倦傍藥鑪眠又  
手詩無膽安心法學禪親朋來饋歲始悟換新年

朱梓廬先生 休度 八十壽詩六十韻

竹垞翁以後接武重耆英並擅儒林譽非關族望榮承  
家傳述作治縣頌神明老學今無敵雄文早有聲邇源  
探漢魏道古企蓬瀛

竹垞太史瀛洲道古錄稿本藏先生處

拄腹曹倉譜

羅胸武庫兵擷華掞鳳策繼晷徹魚更卻埽師先哲

乾隆

癸酉閉關習舉子業是秋得鄉舉

連鑣亞俊兄

先生從兄育泉明府與先生同捷明府爲竹垞

太史蟾宮初閱歷驥足始縱橫攬轡紆籌畫操觚且筆

耕匡時增慷慨到處有逢迎王粲登樓感陳遵入座驚

月分丞相米日送列侯鯖次第聯珠集遲迴淡墨名先生

與育泉明府遙憐河鯉隊別展海鵬程秉鐸官於越抽

毫賦剡城大昕齊鼓篋都講久開黌夜雪舟誰訪春風

席自盈齋鹽怡宦味蝴蝶助詩情典籍資勤采編摩戒

速成壬辰由嵎縣教諭徵入杭州書局凡螺丸天上給

藜火杖頭擎石室儲藏富莆田讐校精籤題揮虎僕硯

滴潤龍睛甲乙身親檢丹黃手細評飽餐槐市藋仍對

桂窗檠先生膺卓薦後歲戊戌將舉南巡盛典

大府聘留總局經理書畫并專撰三天竺志辛

丑又掌教剡川書院壬旋擢雲中宰因辭稷下生己酉

寅掌教金華麗川書院西廣靈狼堆穿險要狐口渡曉崢馬向長城飲琴攜遠

塞鳴巽軒民共樂巽妙軒先生任訟陞盜輸誠似玉壺

山瑩壺山在縣東南一里如簪貝塔平孤塔如簪插柳顛緣溪添

曲檻架嶺縛茅楹樵斧響嵐壑船燈雜管笙六月賽期作船燈為

戲先生岸欹裝略約泉活浴鵲鵲遂改窮山詩時來鬧

野氓窮山開野皆廣靈課農如課士占雨更占晴桑

雉知仁政沙鷗念宿盟性偏耽卷軸塵不染裾纓驂竹

童遮道巾車客迅征囊空無蕙苴貲薄乏笞簾夢憶邊

關笛歡尋鄉社鉦嘉慶丙辰歸田傍灣煙柳裊近寺暮鐘鏗先生

居楊柳灣南

牆影濃青柘

先生有牆下小軒

階痕長綠蘅臥遊

看畫障漫興謝棋枰射鴨施欄矮聽鶯擔榼輕頭銜真  
隱吏位號稱仙卿曠達原難及篇章莫與京律調侔沈  
約品貴壓鍾嶸我昔求提耳公會爲發旨長吟刪跽阿  
麗格黜媚姪疊韻雙聲協高詞險語并擁鑪依木榻翦  
燭話松棚藝術皆殊絕時賢孰抗衡地形論亥巳宅氣  
驗申庚珞瑤推三命襍祥闡五行大才包瑣瑣餘技亦  
錚錚學奧虧垂訓

先生得曾孫詩保家我亦能詒安寡無他訓且願人人學奧虧

營

先生所居名詒安堂

小春春未老愛日日常縈斟酌千巡酒扶

攜七葉嬰

先生曾孫名曰七葉郎

重遊思樂泮

歲己巳先生重遊泮宮

曼壽

比於彭盛事撫言記霓裳詠待賡

先生八十二歲當重赴鹿鳴宴

秋夜追悼素如弟樸

憶弟今何夕聯吟斷此生破窗侵月影靜院鬪蟲聲問  
世惟秋卷招魂泣短檠徒勞識難字應悔逐微名弟爾雅文選默寫無訛字見賞於劉金門少保客歲秋試感疾而歿

雜詩

蛾眉初入室謠詠卽在前讒言亦可畏感彼青蠅篇謂  
鳳爲不祥怪鴟啼青天安能偃蜩蟪至深襲九淵嗟彼  
南箕舌何論然不然丈夫貴自立那受眾目憐

壤非壤不高水非水不流男兒無倚著身世不繫舟平

生負傲骨依人亦可羞托身苟自固于世何所求

書東坡集後

謫仙已死無人續後三百年坡仙作謫仙坡仙一去何  
時還空餘蜀道峨眉山高風萬古誰躋攀仙乎仙乎何  
以醫我頑

夜宿張堯民

昌衢

村居

葡萄酒熟不曾賒閒煞庭前樹樹花花間小鳥提壺喚  
喚我來醉顛張家顛張舊住梅花里梅花幾樹臨長水  
年來小築傍丁溪破屋數間而已矣用昌黎句丁溪破屋風  
雨高裏頭時作寒蟲號硯田不博太倉粟筆耕已禿宣



城臺憶昔來訪秋雨中  
膺門小婢髻花紅  
荅言主人出門去  
滿庭霜葉空  
堂堂重來有約期  
無誤春雨春風渡  
旁渡柳絲青逼水中  
天菜花黃到門前路  
入門一笑喜欲顛  
呼兒出拜燈火前  
讀詩擊節鏗鏗爾  
彈棋落子丁然夜深  
畱我翦燈話典裘  
拚結尋常債同是疎  
狂磊落人舌端挾酒  
談鋒快

三月二十四日爲先大夫生日痛成

地下諸兄色笑隨  
伶仃奉母剩孤兒  
呼天此日嗟何益  
無父餘生祇自悲  
七載光陰空棄擲  
九原窀穸尙稽遲  
傷心并  
不鄉民若猶得生前  
獻壽卮

乙丑先大夫罷大興任養病畱京師

縣民老幼百人  
持酒肉爲壽

宋脩街甄歌爲葛孝廉  
星垣作并序

甄脩廣各一尺楷書八字作二行字徑二寸曰人豐翁  
集市井駢闐旁二行左一行云大宋政和三年癸巳歲  
字體稍殺而筆法與前八字同右一行云大宋嘉泰元  
年辛酉正月十六用石重砌字寸許審其筆法蓋重修  
時加刻也甄陰文十行云秀州嘉興縣郭五鄉居住會  
首胡公佐張世隆精嚴寺淨悟大師有肱張安言羅明  
之馬悅沈奭費元實陳璋吳拱遍募眾緣同力重砌大  
市上官街一道自韭溪橋東砌至菩薩橋聖宋政和三

年六月十一日下手興工甃砌伏願保國安民風調雨  
順仍願捨錢僧俗施主洎普天之下一切有情增延祿  
算植福無疆者書此謹記泥水都料邵宗仁弟宗義等  
崇信書嘉慶庚午里人修宏文館側集街葛君董其役  
於土中得此甃上有政和錢三百古鏡一鎖二拓本見  
貽因作歌

葛君示我修街甃甃文繡蝕青銅錢大書深刻僅八字  
人豐市井臻駢闐甃陰名氏遍僧俗禱求植福無疆祿  
算延我思政和癸巳三月中汴京正作玉清和陽宮甃  
乎何不搜入將作大匠手冷落韭溪橋道莓苔封嘉泰

辛酉二月臨安火民居五萬二千廬舍空甌乎幸不俱  
焚隨玉石是時秀州官街大市砌石重工成書甌紀年  
歲筆畫天矯騰梭龍安民未遠黨碑在鐫字亦見當時  
風又思癸巳迄辛酉厯禩無多八十九甌乎或亦管興  
亾我鄉舊事從汝叩睦州方臘六萬兵攻城不破誰固  
守若非當年王統軍此地翕集安能久軍較作亂高宗  
年建炎二載夏五後御營統制征討平市井當時無恙  
否吁嗟乎南渡恩恩和議成割地竟與金人盟此州幸  
遠淮水界不曾破碎山川形此甌亦等瓦礫賤不隨銀  
絹輸邊庭一鏡雙鎖相伴七百載快劒不斷光青熒鳴

呼此甌昔者築街塵土埋今者修街又見青天開甌乎  
甌乎顯晦亦非偶不獨摩挲銅狄千秋哀

夜坐偶成二絕句

夜階清風生天意厭炎暑幽蟲亦忘機唧唧草閒語  
燈花不忍撥掩卷對窗檠飢鼠齧殘紙蕭蕭風雨聲

七夕有感二首

一度秋風一惘然璇宮夜織幾經年七襄機上無多錦  
何物能償天帝錢

銀漢迢迢碧海秋天孫今夕嫁癡牛那能借取填橋鵲  
填卻人閒萬斛愁

梓廬先生輓詩四首

詩外工夫信絕倫宰官身是苦吟身盡除客氣才逾富

如道家常語必真欹枕暮年耽寂寞

先生晚歲選宋人絕句一千六百餘

首日欹枕閒吟

閉關早歲閱艱辛雙聲疊韻殷勤譜手戰書成

筆有神

先生老年作字自署手戰書

雲中共說良心宰

先生宰廣靈七年人稱良心官

臨去攀轅語尙溫九

月蒔鱸牽別夢七年魚鳥感慈恩至今磧白沙黃地猶

記庚來甲去言

去縣示民詩云本草淵東堪築堡庚來甲去水源源陰陽寬抱民居利巽向乾

山記

巽妙軒中應享祀壺泉垂釣畫圖存

巽妙軒在廣靈之壺山先

生所築去縣時學官弟子詩畱壺泉垂釣圖于此

十七年來鄉味甘神仙吏隱兩無慚老猶帳底攤書坐

病尙牀頭促膝談誰料數真終九九自知期已過三三

先生精數學 壬夫埋骨地親卜好覓詩僧守豫菴先生

自推如此 有身後能添一僧守置菴便以豫菴名句

吾祖舊聯文字契吾家宗伯亦相傾親交及我成三世

知己如公感一生幸有遺言蒙手札得聞妙法賴詩評

先生評余詩及手札畱篋中 壺山吟稿從頭讀一瓣香難達悃誠

癸亥八月思亭吳君修有吳門之行梓廬先生

送於楊柳灣賦七言長句以誌別思亭倩宋

芝山學正畫柳灣別意圖甲戌三月思亭卜

居楊柳灣出圖見示時先生不世已二年矣

愴然有作

一舸柴門去寂寥小灣烟柳暮蕭蕭無情最是灣頭水

直送離愁十四橋

雨中一舸去柴門梓廬先生送別句明日烟波十四橋思亭畱別句

朱翁與我論佳句每說吳生最擅場

思亭方纂佳句錄

今日里

門行哭久逢君話舊一淒涼

新移家具住城中占得灣頭地數弓楊柳不知十年事

向人兀自舞春風

趙中令琴歌胡仁圃

祥麟屬乙亥

空齋晝靜焚旃檀古琴挂壁生清寒漆文雖作蛇腹斷



醞釀開國元氣神猶完鳳池之中有遺字乾德元年趙  
普製重修者誰張順修漢雯山人名同畱吾聞太宗欲  
法文武增二絃惜哉蔡裔所製今不傳是時雅樂尙未  
定此琴那獨中和全何人試按和峴律使與义手之笛  
同清圓枯桐或是秦隴木屋材之餘琴材便飾徽不用  
瓜子金十瓶或未來海壖想當熾炭燒肉後應和靡玉  
聲纏綿靡玉宋太祖琴名不然拋琴風雪夜終讀論語二十篇  
嗚呼陳橋排闥功莫京國家之事由書生誓書尾署臣  
普記陛下不誤誰所成彈之莫作履霜操九原骨朽心  
難平君不聞中有癡兒臨死嗚咽悲啼聲

吳越王鐵券歌

天目山水流湯湯斗牛王氣占錢塘貴人乃在羣兒行  
指揮隊伍精且詳黃腰之獸方猖狂乘輿逼迫趨鳳翔  
二十人乃攫其吭所惜道遠難勤王羅平圖讖誇休祥  
骰子一擲爭相將俱起鄉里恩難忘越州況又隣餘杭  
是時兵若連董昌黃衣白衣紛騰驤朝廷縱欲揮天槍  
長戈利戟能相當反狀直上政事堂詔書一下趣軍裝  
小西江口天茫茫三萬兵竟誅蜩蟬平生長槩青含霜  
射殺妖鳥餘鋒鋌天子曰汝功難量兇渠惟爾能披攘  
拯救塗炭成金湯勦勞自合銘旂常三百餘字黃金相

鎔成鐵券辭煌煌中使乃遣焦楚鐸宣奉名署崔緇郎  
謝表謹達御榻旁禍生福過時周防縱邀容恕君恩長  
臣心那敢慈愛傷江南半壁勤保障十四州土時豐穰  
花開陌上春風香玉帶御馬歌還鄉後來黃祿收土疆  
三世四王名同芳嗚呼此券昭遐荒入水不溺斧不戕  
八百年後台州藏進

御裝匣蒙

天章尙荷

聖主嘉謙光

詔修祠宇虔烝嘗要令子姓知忠良努力

盛世同廣揚

陳新筵丈

寓

文後山丈

鼎

摹名印見贈賦謝

吾初得識種水翁

曹丈言純

嗜好與我酸鹹同鼎鼎名印出

相示豆瓣楠匣開緘封云是文陳兩君製戲鈐便面丹

砂紅良田二頃那肯易奉揚令我懷清風

甲戌六月種水爲余書扇

并取兩君新製名印雜印背面

陳君小篆乃無匹八分真草兼精通錚

錚餘技到鐵筆秋毫神妙天無功文君鑒賞今巨眼停

雲畫派傳其宗鐫刻亦得雁湖法參以變化通神工我

聞秦漢古書法摹印乃在八體中繆篆纏繞貴曲官

私製造結體崇又聞十七試爲吏諷九千字成學僅當

時字學盡能講小技故亦精雕蟲城皋長吏印各異伏  
波書上摹勒重溟陽印乃水心誤地志沿誤名相蒙印  
之所繫本非細況乎私印關吉凶填篆之法在書史米  
老已矣今誰雄陳君憐我好古癖爲篆數紐精磨礪文  
君聞之色飛舞花乳石亦爲我攻安得上品好書畫紫  
泥丹雘鈴其終空拈秃筆亂塗抹迺以名字煩諸公名  
之完缺在自守惟願貞石之壽侔金銅

### 登吳山

武林四度來吳山足未到今者踏飛梯竊被山靈笑我  
笑謝山靈臨風一閑眺金碧瓦參差人聲發萬竅城市

見燈火我衣有殘照大江不斷流帆檣立孤隋西湖祇  
杯水一覽盡其妙

大觀臺觀弈

高臺何崔巍其平却如砥入門無人聲丁丁落棋子或  
纔一局終推枰笑相視或猶黑白爭枯坐時隱几危哉  
勝負場整暇乃如是細意時觀我精心貴知彼隱隱伏  
殺機默默見神技步上坎卦壇一究陰陽理

飛來峯

峯上有佛坐箕踞我欲問佛佛不語何年何地忽飛來  
飛來如何不飛去

朱宦巢聲和壘石圖

阿翁舊有烟霞癖拂拭壺山豁幽僻丹青尺幅寫成圖

畫裏時時念遊展

梓廬先生宰廣靈曾畫壺山圖

眼中忽見山峯青一

朵芙蓉落庭隙娛親君倩巧匠爲似割壺山一痕碧翁  
曾招我石旁坐指點蒼巒劇怡悅興來高咏長句詩墨  
瀋淋漓照几席君初壘石我未見翁示我詩說疇昔我  
今對畫一愴然況讀翁詩見遺墨當年舊事忍重論侍  
坐蒼苔亦陳迹邊城德政已磨崖此是君家鬱林石

芍藥花時吳思亭招同人集青霞館出觀喬侍  
讀一峯草堂看花詩冊卽席分和冊中詩得

湯西崖先生韻

主人愛客客愛酒酒人遄集如飢鷹庭前芍藥花正好  
金帶乍欲開緘勝對花不問誰主客千觚且向花前騰  
祝花願花無寒暑自春直至冬凝冰酒常不斷花常好  
花光滿眼酒填膺花不能言對以臆願主人壽如岡陵  
主人拚作百年醉花亦得酒莫不增是時座中各歡笑  
超然物外無畦塍酒闌出示舊詩帙筆力透紙中藏稜  
石林先生劇好事惜花直欲忘寢興疾風經句雨新霽  
草堂折簡招賓朋海棠兩樹鬬嬌好看花諸老肩相凭  
紅粧欲語含婀娜白髮靜對搔鬢髻遺篇默數歲幾易



亂蕊那問紅千層雲烟過眼等閒耳對花痛飲花莫憎  
主人況有四方志獨遶百市情不勝花名將離差解事  
開如雲蔚如霞蒸却防雨風損顏色繡幕那惜吳中綾  
各拈舊韻鬪奇險要使佳句得未曾我歌拉雜花欲笑  
徒紆春蚓災溪藤

述懷三首

丙子

六歲入小學早受六經義父母望我心我能說一二曰  
讀聖賢書略識聖賢志我家忠孝家所事忠孝事漢唐  
宋諸儒闡發無二致因循廿年來曾未一經治開卷不  
敢讀一字一行淚

近者百年內遠者千載餘古人與今人遠近常相須相  
須不相待味道畱其腴流傳在六籍所以舉一隅其中  
有疑義還望今人祛讀書守章句所得僅皮膚結想文  
字外悠然見古初

丈夫不凍餒此外何營營還讀古文字庶遠俗性情素  
心六七人相與期有成所以相告戒不在軒冕榮父母  
不我待餘生敢自輕默念父母教還感師友誠庶免一  
朝患敢希千載名

讀先曾祖文端公族父少宗伯公詩集偶有感  
觸敬繫兩絕句

先公每頌不忘規

天語褒題海內知感遇早輕陳伯玉平生風度曲江師

先公感遇十二  
首用曲江韻

宗伯西江派偶然遠探漢魏得真詮流傳莫漫加嗤點  
細讀僮歸十七篇

謝文節琴歌杭州吳

景湖  
徵賦

疊山先生一去五百年此琴乃與橋亭之硯同流傳銘

辭那藉程文海八分二十親題鐫

上鐫號鐘二字下自  
署疊山銘文十六字

云東山之桐西山之梓  
合而爲一垂千萬古

吁嗟乎慷慨赴死良不易況又

從容能就義公平淚落曹娥碑琴亦聲絕憫忠寺招魂

幸未擊石碎不似西臺竹如意噫吁嘻公昔不食西山  
薇琴今流落西湖湄與化往來亦天付要使忠魂磊落  
一寫故國悲太陵憔悴冬青樹剩有秋蟲弔秋露攜琴  
莫近賈相園聲咽冰絃向誰訴我思先生之骨雖葬信  
州土先生忠魂戀故主上作湖山雲下作湖山雨正氣  
正聲在危柱君不見文文山瑤琴常在天地閒又不見  
趙文敏震餘之琴更誰省乃知此琴萬古垂孤忠不然  
世閒那少西山之梓東山桐

明僉事金公遺像詩

并序

金公名應奎仁和人嘉靖癸丑進士授吏部主事不謁

嚴嵩十年不調嵩敗由御史爲山東僉事以巡河功遷  
四川按察使尋降僉事杖馮保家人被劾歸公九世族  
孫應麟爲葺其墓更以遺像徵詩

西苑羅方士雷壇傍帝居青詞推上相黃籙奏天書選  
局方虛席權門肯曳裾如公耽寂寞那屑借吹噓散櫟  
同長棄芳蘭僅免鋤頭銜眞冷淡鑿枘本齟齬自等郎  
潛跡非求道直譽相旋誅大小名稍得遷除罷直明光  
殿新超御史廬人方避驄馬帝許整輶車僉事來山左  
河流奠濁渠由來能捍禦得不廢耕畬懷抱原殊絕才  
能略展舒邊防資牧馭時事益欬歔司禮傳遺詔江陵

奉帝儲徒懸丹闕陞遠泣錦城旗月照蛾眉晚雲連棧  
閣虛欲求斬馬劍望斷六龍輿惱甚狂奴態空憐法網  
疏甘隨拋印綬歸卽溷樵漁林下攜籠鶴湖邊策蹇驢  
沙光迎杖屨詩韻戛瓊琚軼事遺前史新阡表故墟歲  
時贍俎豆粉社接鄉閭繡豸陳言曰先九世祖贈太常寺卿海石公嘉靖壬辰進士官禮科給事中以直言削職歸青衿上疏初先六世族祖御史孚上疏劾魏忠賢十大罪孤宗鳴驚鴛莫國重璠璣清白官箴在芬  
芳世守餘因君懷祖德忠節卻相如

戲作諸泥歌和金岱峯衍宗

趙君家有未名寶傳聞此寶來扶桑厥名諸泥董君說

數行題識存縹囊體徑六寸厚半寸質如髹漆黝有光  
吾生非眇不識日扣槃捫燭同茫茫以之承日辨光彩  
恍如洞見垣一方兒童爭說日大小各各目力誇精強  
那知正坐眼孔隘度光數質徒評量吾思扶桑遙遙不  
知幾萬里孰曾眼見能致此或者夸父逐日持此還如  
支機石來自銀河灣不然神物會飛度隨日上下偶落  
塵土間胡君仁考古窮搜研謂此貢自天監年名觀日  
玉燕公記上視日中宮闕如眼前今人眼力不如古但  
見蒼蒼涼涼如盤如盂又若車蓋然吾家觀察公大梁  
昔曾遇二十餘年見如故毫髮相同無差互乃知此寶

世有雙何年合致雙璧豁我兩目曉題詩且還趙家壁  
日光瞳矐照我琉璃窗

元延祐甲寅江西鄉試第二場石鼓賦卷

并序

賦凡八篇作者李丙奎徐如士王與玉陳祖義李路羅  
曾吳舜凱蘇宏道蘇君書同舉七人之作而以已作殿  
之乾隆壬辰族父少宗伯公得見墨蹟手錄一通系之  
以詩翁覃溪錢竹汀姚姬傳程魚門吳白華嚴冬友諸  
先生皆有詩俱公手錄後有成親王題跋及泰和姚先  
生頤詩則乙未補題也嘉慶丙子歲八月

泰吉

從公孫

昌言  
處謹摹一卷而綴以詩曰



皇慶詔定科舉制諸路貢士來駢闐三場席舍各努力

經疑詔策窮搜研今觀此卷但古賦豈真長短難兼全

吳文正公跋程君正程文云往年余考鄉試程文長於此或短於彼兼全而俱優者不多見也善辭通

古已略具次場在通古善辭摘章繪句何有焉元史選舉志皇

慶二年中書省臣奏詞賦乃是科主文章廬子科第衣

鉢誰當傳李君更名成進士羅君左榜茅茹連李路羅

乙卯進士楊李君更名見羣才濟濟偶下第授職聊免

悲迤邐選舉志下第舉人延祐間命大庭進對吐所學

私居博考窮簡編先生夙抱公私志諸君此志應同堅

文正發解時謝張教書云公欲進對天子之庭以據其致君澤民之蘊私欲釋去科舉之累以遂其讀書修己

之心倘得大庭進策之晨少吐所學之萬一然後退而私居博考載籍力學聖賢則某之志願畢矣見草廬集後來丁巳再主試君質持檄來臨川贈詩喜得諸貢士相看冰雪真蕭然當時入手寶珠玉豈意過眼同雲烟

文正題延祐丁巳諸貢士詩云江西省試士與選者二十有二人省府命其屬吏王君質持檄詣門禮請赴省敦遣諸貢士蕭然清寒頽簷敗壁冰雪相看其禮使人也各賦一詩而已君質得所贈詩如寶珠玉余喜而題其卷吾家宗伯見此卷屈指已逾四百年流傳信有神

物護鈔寫正直齋宿虔後公亦主江西試兩榜玉筍班行聯乾隆甲午己亥公匡彭佳秀信不乏足使輝映成後先嗚呼有元統國四十載鹿鳴始奏貢士筵先時豈必乏才俊他途競進誰爲賢當年合格三百士幾經困

厄延祐前臨風掩卷三嘆息書名竹帛信有天

竹帛書名固有

天文正貢院校文詩

### 哭張堯民孝廉七首

我少失諸兄如手足枯僵所賴賢友生疾痛相扶將擇  
交始得子三益慰所望有若就規矩因子成圓方又如  
涉江漢以子爲津梁投分逾膠漆信誓無參商至今忍  
追憶追憶摧衷腸

世父農部公論材識眞僞憶昔己巳秋子來謁公始新  
詩千餘言出語見精粹公喜動顏色子詩卽我示謂此  
年少才吾當讓頭地小子苦獨學盍以師友事凡公望

我心於子默相寄我學尙無成子音竟誰嗣迴思五年  
來重墮哭公淚

與子定交日屈指八載餘文字互商略質樸見古初當  
面或相詆背面還相諛相諛非阿好相詆非齟齬我叔  
曾館子與我連牆居我往常數數子來亦徐徐坐久童  
僕怪竊聽來庭除相對或無言各執一卷書高詠盡晨  
夕此樂成欬歔

君家梅會里居近曝書亭同志五六人醞觴畱典型李

次白馬柳東

究訓詁文字辨石經子時與折衷議論如

翻瓶史

竹南屠梅西

講心性義闡東西銘同儕嗤其迂

子爲堅關扃凡子所交游我亦成忘形相與期白首不  
願俗眼青前年屠君死遺墨嗟飄零子來與我語淚落  
時潏潏豈知又哭子我徒眞伶仃

才高命苦薄道充身何孱艱難一登榜轉瞬罹憂患連  
朝失子女諒子情何堪謂方壯盛年得子非所艱況值  
登榜日吉語哀情參欲往一慰藉念子常往還往還定  
相見鼓棹停再三豈知十日前值子來叩關叩關不相  
見讀子書循環豈知十日後惡耗驚來傳重尋子書讀  
墨瀋餘斑斑嗚呼竟永訣一面天猶慳

君家四兄弟季也死無後君於伯仲閒辛苦事老母由

來積善家食報理應厚天或培其根樹立定不朽胡爲  
又弱一伊誰執其咎兩昆淚吞瞽苦語向誰剖家無一  
畝田故業青氊守上有白髮親下有青年婦三女尙未  
字付託定誰某道路猶嘆息況我平生友

死者長已矣生者能不悲與子永訣絕哭子能無詩我  
詩所能言和淚一灑之我詩不能言默默長自思嗚呼  
骨肉交情至類如斯凡百友君子視我酸楚詞

偕吳榕園丈

應和

曹種水丈

言純

至富陽次榕

園韻 丁丑

前年京江口悵望不可越瓜步寒潮生金焦見恍惚今

來曲江潯得探山水窟富春想雄風霸圖已消歇偕行  
得二老共酌江心月周覽勝遠遊何必凌窮髮

江心驟雨

江氣暗吞天天光淡無色急雨欲來時客子意不適越  
山未了青濃雲忽翻墨風挾魚龍腥聲作鼉鼉泣天公  
怒一振變滅隨霹靂羣動息鼓盪餘勢但點滴依然挂  
帆行不礙孤蓬溼

江行

江千雲氣出山麓并入炊烟失茅屋叢叢惟有遠林青  
林際斜陽墮深谷船頭酌酒成高歌一杯敬醉神無訶

舟行如山兀不動冷月照水清無波

富陽南樓

昨夜白雲封翠微且登高閣待朝暉城頭老樹月留影  
城內人家竹掩扉山勢靜隨江勢折濤聲暗逐榜聲飛  
因風想像嚴灘路正好鱗魚上釣磯

同人集烟雨樓送吳鯨村

載和

赴濟南戴太守

之招

富陽相公東閣開接君便坐誇奇才大庾相公見君喜  
後堂絲竹清且美兩公相業房杜賢說君同音笙磬然

舊唐書房杜傳贊云  
笙磬同音惟房與杜

天門蕩蕩看汲引魚龍變化謂上



天十年寫書博微秩稱意功名信難必青鞵布襪歸去  
來越鳥思南北風疾年來賃屋居吾鄉大府書幣陳焜  
煌濟南太守劇愛客更遣使者趨行裝朝辭大府暮就  
道故人取別何草草爲言昔從相公喪曾陪太守趨西  
江相從僅得八月耳時勞遠憶心神懣書來促行那得  
遲夢魂已到厯水湄隨車甘雨日多暇吐茵接坐懷當  
時知君此去定快意況對鵲華山色翠春風秋雨鴛鴦  
湖獨我難忘翦燈地柳絲百結愁空綰抽帆已有白雲  
閒題句應登海右亭寄書還望江頭雁感君意氣如醅  
醕潤入骨髓融肌膚微言規我良有以苟或忘之如白

水

病瘡不寐憶岱峯客徐州

道光辛巳

燈昏欲睡病魔驕坐覺風侵鬢髮凋身外炎涼藥難解  
胸中芒角酒能澆舊書頗耐從頭憶近事差容過眼消  
問訊故人歸也未彭城無夢已連宵

偶成

窮如鼯鼠技難成或有詩篇待品評伴我梅花渾欲笑  
照人明月總無情興來獨立看長劍愁絕閒吟對短檠  
食肉幾曾出奇計將軍眞負腹彭亨

蔣華隱明經

浩

將之京師應

廷試以詩集見

貽并爲畫舊邨讀書圖勝以新詩賦答二首

壬午

讀君千首詩洗我百斛塵相從苦不早及此臨別辰黃  
鐘無細響必爲廊廟珍知君獻賦日紙貴京華春

聖主方求言民隱宜盡陳一吐胸中奇逸氣盤輪困上  
以副 明詔下以榮慈親

秦溪有敝廬先人所卜築我將遠城市於此混樵牧十  
畝田可耕萬卷書可讀作樛捕寒魚拓園養春竹十年  
願未遂食言愧宗族得君畫落成我疑不須止君其早  
歸來新詩賦茅屋

得岱峯臨安學舍書卻寄

癸未

廣文書到苦言貧  
飢餓看山蒜髮新  
食少花豬兒女瘦  
規依白鹿學徒親  
經師自古歸儒者  
大雅須教有替人  
莫倚官閒無一事  
但吟蝴蝶句通神

懷吳縣村客漳州

交傾肝膽僕夫知  
難忘青齊並轡時  
旅館荒村縱牢落  
鞭絲帽影不差池  
劇憐遠客仍無賴  
大好春光孰共嬉  
料得懷人漳浦月  
嬌兒侍坐勸深卮

送沈蓮溪秋曹

源二首

騷人例掌白雲司  
之子頭銜雅稱之  
辛苦不忘慈母訓

賢勞自荷

聖明知暮雲春樹論文候細雨孤燈讀律時定有平反  
傳美政好將書慰故交思

難弟難兄眾所推十年試席記追陪文成翻水笑相對

口有懸河語帶詼舊侶漸稀憐獨學新知雖廣孰通才

尙煩爲報老宗伯根本功夫愧未培

惟時老宗伯氣壓羣兒懷東坡謂歐

陽公也余與蓮溪兄弟同受知於汪  
瑟菴宗伯宗伯時以培養根本爲勛

東嶧縣廣文葛素如兄

星垣

甲申

久別金庭葛稚川雪中擬放子猷船飯香飽啖仙人菜  
茶熟同烹大士泉嘯浦雲烟爭激灩剡溪風月信洄沿

寄聲莫動思歸興堂闕淵源繼昔賢

題吳童子柳陰垂釣圖 乙酉

卜居楊柳灣兩家共流水敲鍼作釣釣我亦有稚子吳  
郎少小足文史智勝凡兒三十里持竿共釣溫水旁我  
慚昌黎子侯喜君不聞大魚豈肯居沮洳昌黎句釣鼇應  
向海上居期君讀書富五車他年侍從承明廬賞花後  
苑同釣魚

題李貞女詩冊

貞女爲孝廉方正介石先生穀女

梅花溪松江水日夜雙流清且泚李家有女名壽筠八  
歲許嫁蔡氏子江流一決無還期梅花枯盡青青枝女

心如石堅不移蔡郎雖死將安歸君不聞李翁昔治父  
母疾兩臂手割無完膚婦亦刲肱療其姑阿母孝婦父  
孝子生女自與常人殊吁嗟乎婦人從一古所敦女貞  
之義易取屯情緣義起情可伸盤桓險難良苦辛丈夫  
立言勵薄俗況我貞孝之後人先大母貞孝馮恭人於  
乾隆三十七年題旌  
手題此冊三歎息不獨爲女淚沾臆

朱泂泉少尹

聲廉

官通潞時畫鴛湖鼓棹圖以

寓歸思道光丙戌罷官居里門出圖屬題爲

賦三絕句

懷鄉重唱百篇詩蟹舍漁村繞夢思公事惟傾月波釀

甘泉鄉人稿卷二十一  
新銜合換釣魚師

潞河安穩下輕帆  
鶴謝樊籠馬脫銜  
天遣歸尋鷗鷺約  
不教夜夜夢青杉

一官且莫怨蹉跎  
試向花前醉踏歌  
不是黑罡風斷渡  
扁舟那得在烟蘿

甘泉鄉人稿卷二十一